




宮闈典第五十六卷

乳保部紀事

西京雜記趙王如意年幼未能親外傳戚姬使趙王內傳趙媼傳之號其室曰養德宮後改爲魚藻宮

史記滑稽傳武帝時有所幸倡郭舍人者發言陳辭雖不合大道然令人主和說武帝少時東武侯母常養帝帝壯時號之曰大乳母率一月再朝朝奏入有詔使幸臣馬游卿以帛五十匹賜乳母又奉飲糲飧養乳母乳母上書曰某所有公田願得假倩之帝曰乳母欲得之乎以賜乳母乳母所言未嘗不聽有詔得令乳母乘車行馳道中當此之時公卿大臣皆敬重乳母乳母家子孫奴從者橫暴長安中當道掣頓人車馬奪人衣服聞於中不忍致之法有司請徙乳母乳母家室處之於邊奏可乳母當入至前面見辭乳母先見郭舍人爲下泣舍人曰卽入見辭去疾步數還顧乳母如其言謝去疾步數還顧郭舍人疾言罵之曰咄老女子何不疾行陛下已壯矣寧尙須汝乳而活耶尙何還顧於是人主憐焉悲之乃下詔止無徙乳母罰謫譖之者

漢書丙吉傳吉字少卿魯國人也武帝末巫蠱事起吉以故廷尉監徵詔治巫蠱郡邸獄時宣帝生數月以皇曾孫坐衛太子事繫吉見而憐之又心知太子無事實重哀曾孫無辜吉擇謹厚女徒令保養曾孫置閒燥處吉治巫蠱事連歲不決後元二年武帝疾往來長楊五柞宮望氣者言長安獄中有天子氣於是上遣使者分條中都官詔獄繫者亡輕重一切皆殺之內謁者令郭穰夜到郡邸獄吉閉門拒使者不納曰皇曾孫在他人亡辜死者猶不可況親曾孫乎相守至天明不得入穰還以聞因劾奏吉武帝亦寤曰天使之也因赦天下郡邸獄繫者獨賴吉得生恩及四海矣曾孫病幾不全者數焉吉數敕保養乳母加致醫藥視遇甚有恩惠以私財物給其衣食宣帝初卽位賜吉爵關內侯吉爲人深厚不伐善自曾孫遭遇吉絕口不道前恩故朝廷莫能明其功也地節三年立皇太子吉爲太子太傅數月遷御史大夫及霍氏誅上躬親政省尙書事是時掖庭宮婢則令民夫上書自陳嘗有阿保之功章下掖庭令考問則辭引使者丙吉知狀掖庭令將則詣御史府以示吉吉識謂則曰汝嘗坐養皇曾孫不謹督笞汝安得有功獨渭城胡組淮陽郭徵卿有恩耳分別奏組等共養勞苦狀詔吉求組徵卿已死有子孫皆受厚賞詔免則爲庶人賜錢十萬上親見問然後知吉

有舊恩而終不言上大賢之制詔丞相朕微眇時御史大夫吉與朕有舊恩厥德茂焉詩不云乎亡德不報其封吉爲博陽侯邑千三百戶

孝元傳昭儀傳成帝母王太后欲令傳太后丁姬十日一至太子家成帝曰太子承正統當共養陛下不得復顧私親王太后曰太子小而傳太后抱養之今至太子家以乳母恩耳不足有所妨於是令傳太后得至太子家丁姬以不小養太子獨不得

孝成趙皇后傳哀帝立後數月司隸解光奏言臣聞許美人及故中宮史曹宮皆御幸孝成皇帝產子子隱不見臣遣從事掾業史望驗問知狀者掖庭獄丞籍武故中黃門王舜吳恭靳嚴官婢曹曉道房張棄故趙昭儀御者于客子王偏臧兼等皆曰宮卽曉子女前屬中宮爲學事史通詩授皇后房與宮對食元延年中宮語房曰陛下幸宮後數月曉入殿中見宮腹大問宮宮曰御幸有身其十月中宮乳掖庭牛官令含有婢六人中黃門田客持詔記盛綠綈方底封御史中丞印予武曰取牛官令舍婦人新產兒婢六人盡置暴室獄母問兒男女誰兒也武迎置獄宮曰善臧我兒胞丞知是何等兒也後三日客持詔記與武問兒死未手書對牘背武卽書對兒見在未死有頃客出曰上與昭儀大怒奈何不殺武叩頭啼曰不殺兒自知當死殺之亦死卽因客奏封事曰陛下未有繼嗣

子無貴賤惟留意奏入客復持詔記予武曰今夜漏上五刻持兒與舜會東交掖門武因問客陛下得武書意何如曰慳也武以兒付舜舜受詔內兒殿中爲擇乳母告善養兒且有賞毋令漏泄擇棄爲乳母時兒生八九日後三日客復持詔記封如前予武武皆表奏狀棄所養兒十一日宮長李南以詔書取兒去不知所置 王莽傳莽策命嬰爲安定公以故大鴻臚府爲安定公第皆置門衛使者監領敕阿乳母不得與語帝在四壁中至於長大不能名六畜

後漢書楊震傳震永寧元年代劉愷爲司徒明年鄧太后崩內寵始橫安帝乳母王聖因保養之勤緣恩放恣聖子女伯榮出入宮掖傳通姦賂震上疏曰臣聞政以得賢爲本理以去穢爲務是以唐虞俊乂在官四凶流放天下咸服以致雍熙方今九德未事嬖倖充庭阿母王聖出自賤微得遭千載奉養聖躬雖有推燥居濕之勤前後賞惠過報勞苦而無厭之心不知紀極外交屬託擾亂天下損辱清朝塵點日月書誠牝雞牡鳴詩刺哲婦喪國昔鄭嚴公從母氏之欲恣驕弟之情幾至危國然後加討春秋貶之以爲失教夫女子小人近之喜遠之怨實爲難養易曰無攸遂在中饋言婦人不得與於政事也宜速出阿母令居外舍斷絕伯榮莫使往來令恩德兩隆上下俱美惟陛下絕婉



變之私割不忍之心留神萬機誠慎拜爵減省獻御損節徵發令野無鶴鳴之嘆朝無小明之悔大東不興於今勞止不怨於下擬蹤往古比德哲王豈不休哉奏御帝以示阿母等內倖皆懷忿恚而伯榮驕淫尤甚與故朝陽侯劉護從兄環交通環遂以爲妻得襲護爵位至侍中震深疾之復詣闕上疏曰臣聞高祖與羣臣約非功臣不得封故經制父死子繼兄亡弟及以防篡也伏見詔書封故朝陽侯劉護再從兄環襲護爵爲侯護同產弟威今猶見在臣聞天子專封封有功諸侯專爵爵有德今環無他功行但以配阿母女一時之間既位侍中又至封侯不稽舊制不合經義行人誼譁百姓不安陛下宜覽鏡既往順帝之則書奏不省

通鑑綱目延光元年冬遣宦者及乳母王聖女伯榮詣甘陵尙書僕射陳忠上疏曰竊聞使者所過威動郡縣王侯二千石至爲伯榮獨拜車下修道繕亭徵役無度賂遺僕從人數百匹伯榮之威重於陛下陛下之柄在於臣妾水災之發必起於此昔韓嫣託副車之乘受馳視之使江都誤爲一拜而嫣受毆刀之誅臣願明主嚴天元之尊正乾剛之位不宜復令女使干錯萬幾書奏不省

冊府元龜安帝時太后臨朝帝不親政事小黃門李閭與帝乳母王聖嘗共譖太后兄執金吾鄧悝

等言欲廢帝立平原王德帝每忿懼及太后崩遂誅鄧氏而王聖女伯榮扇動內外競爲侈虐明年帝崩立北鄉侯爲天子王聖及黨皆見徙

後漢書清河孝王慶傳慶母宋貴人葬禮有闕每竊感恨至四節伏臘輒祭於私室竇氏誅後始使乳母於城北遙祠

左雄傳雄爲尙書令初帝廢爲濟陰王乳母宋娥與黃門孫程等共議立帝帝後以娥前有謀遂封爲山陽君邑五千戶又封大將軍梁商子冀襄邑侯雄上封事曰夫裂土封侯王制所重高皇帝約非劉氏不王非有功不侯孝安皇帝封江京王聖等遂致地震之異永建二年封陰謀之功又有日食之變數術之士咸歸咎於封爵今青州饑虛盜賊未息民有乏絕上求稟貸陛下乾乾勞思以濟民爲務宜循古法寧靜無爲以求天意以災消異誠不宜追錄小恩虧失大典帝不聽雄復諫曰臣聞人君莫不好忠正而惡讒諛然而歷世之患莫不以忠正得罪讒諛蒙倖者蓋聽忠難從諛易也夫刑罪人情之所甚惡貴寵人情之所甚欲是以時俗爲忠者少而習諛者多故令人主數聞其美稀知其過迷而不悟至於危亡臣伏見詔書顧念阿母舊德宿恩欲特加顯賞案尙書故事無乳母爵邑之制唯先帝時阿母王聖爲野王君聖造生讒賊廢立之禍生爲天下

所咀嚼死爲海內所歡快桀紂貴爲天子而庸僕羞與爲比者以其無義也夷齊賤爲匹夫而王侯爭與爲伍者以其有德也今阿母躬蹈約儉以身率下羣僚蒸庶莫不向風而與王聖並同爵號懼違本操失其常願臣愚以爲凡人之心理不相遠其所不安古今一也百姓深懲王聖傾覆之禍民萌之命危於累卵常懼時世復有此類怵惕之念未離於心恐懼之言未絕於口乞如前議歲以千萬給奉阿母內足以盡恩愛之歡外可不爲吏民所怪梁冀之封事非機急宜過災戾之運然後平議可否會復有地震緱氏山崩之異雄復上疏諫曰先帝封野王君漢陽地震今封山陽君而京城復震專政在陰其災尤大臣前後謦言封爵至重王者可私人以財不可以官宜還阿母之封以塞災異今冀已高讓山陽君亦宜崇其本節雄言數切至娥亦畏懼辭讓而帝戀戀不能已卒封之後阿母遂以交遭失爵

晉書石季龍載記石邃保母劉芝初以巫術進既養邃遂有深寵通賄賂豫言論權傾朝廷親貴多出其門遂封芝爲宣城君

宋書劉懷肅傳懷肅次弟懷敬澀訥無才能初高祖產而皇妣殂孝皇帝貧薄無由得乳人議欲不



舉高祖高祖從母生懷敬未甚乃斷懷敬乳而自養高祖高祖以舊恩懷敬累見寵授至會稽太守尚書金紫光祿大夫

南齊書后妃傳敘太祖二年乳人乏乳后夢人以兩甌麻粥與之覺而乳大出異而說之

陳書始興王叔陵傳叔陵高宗第二子也高宗崩翌日後主哀頓俯伏叔陵以剉藥刀斫後主中項太后馳來救焉叔陵又斫太后數下後主乳嫗吳氏時在太后側自後挈其肘後主因得起

隋唐嘉話高宗乳母盧本滑州總管杜才幹妻才幹以謀逆誅故盧沒入於宮中帝旣卽位封燕國夫人品第一盧旣藉恩寵屢訴才幹枉見構陷帝曰此先朝時事朕安敢追更先朝之事卒不許及盧已亡復請與才幹合葬帝以獲罪先朝亦不許之

唐書太宗長孫皇后傳太子承乾乳嫗請增東宮什器后曰太子患無德與名器何請爲

肅宗吳皇后傳代宗生之三日帝臨澡之孫體孱弱負姆嫌陋更取他宮兒以進帝視之不樂負姆叩頭言非是帝曰非爾所知趣取兒來於是見嫡孫帝大喜

五代史唐王淑妃傳初明宗後宮有生子者命妃母之是爲許王從益從益乳母司衣王氏見明宗

已老而秦王握兵心欲自託爲後計乃曰兒思秦王是時從益已四歲又數教從益自言求見秦王明宗遣乳嫗將兒往來秦府遂與從榮私通從榮因使王氏伺察宮中動靜從榮已死司衣王氏以謂秦王實以兵入宮衛天子而以反見誅出怨言愍帝聞之大怒賜司衣王氏死

遼史聖宗本紀統和元年六月乙卯皇太妃諸王公主迎上嶺表設御幄道傍置景宗御容率從臣進酒陳俘獲於前遂大宴戊午幸涼涇以所俘分賜皇族及乳母

宋史苗貴妃傳妃開封人父繼宗母許先爲仁宗乳保出嫁繼宗帝登位復得通籍

宣仁聖烈高皇后傳宋用臣等旣被斥祈神宗乳嫗入言之冀得復用后見其來曰汝來何爲得非爲用臣等遊說乎且汝尙欲如曩日求內降干撓國政耶若復爾吾卽斬汝嫗大懼不敢出一言自是內降遂絕

東坡志林溫成皇后乳母賈氏宮中謂之賈婆婆賈昌朝連結之謂之姑姑臺諫論其姦吳春卿欲得其實而不可近侍有進對者曰近日臺諫言事虛實相半如賈姑姑事豈有是哉上默然久之曰賈氏實曾薦昌朝非吾仁祖盛德豈肯以實語臣下耶

大政紀成化四年八月戶科給事中李森言翊聖夫人劉氏屢蒙賜給田地今又求通州武清縣地三百餘頃陛下不忍拒之殊不知谿壑之慾無厭畿內之地有限小民賦稅衣食皆出於此一旦奪之何以爲生且入皇朝來百年於茲民生日衆安得尙有不耕閒田名爲求討實則強占乞勅有司仍將劉氏田地與民爲業今後敢有投獻奏求者許科道劾奏治以重罪則豪強畏法小民被惠宗社幸甚

酌中志略逆嫗客氏者定興縣民侯二之妻生一子曰國興娶不多年泰昌元年冬封奉聖夫人住乾西二所天啟初年移住隆德殿之西南曰咸安宮每日黎明時入暖閣至先帝御前甲夜后始回咸安宮鳳彩門亦有直房凡逆賢往宮相見時必將宮人官人屏開語祕不得聞然上危中宮皇后及裕妃張娘娘等獨用王體乾殺王安王國臣等皆客氏造謀盡出客氏意也其母老矣彼時尙在每以惜福持滿戒勸客氏不聽凡客氏於天啟元年二年間中旨慰留者體乾力也七年九月初三日奏懇今上准歸私第其夜五更開宮門之后客氏衰服赴仁智殿先帝梓宮前出一小函用黃色龍包袱裹云是先帝胎髮瘡痂及累年剃髮落齒剪下指甲遂痛哭焚化而出至奉旨籍沒步赴浣

衣局於十一月內欽差乾清管事趙本政臨局筭死發淨樂堂焚屍揚灰其子侯國興伏誅其弟客光先止擬戍邊客氏掌班內官張貴劉牛其名下崔祿許國寧等各行賄得免客氏貴顯時惟王體

乾耆舊魏忠賢表裏梁棟舊人凡送禮僅下小的帖都不叩頭自孫進王朝輔劉應坤李永貞石元雅涂文輔及管事牌子劉忠王應科胡明佐等每日見必叩頭如子姓焉夫以乳媼儼然住宮自視爲聖主八母之一亦僭妄殊寵極矣且倏出倏入人多訝之道路流傳訛言不一尙有非臣子之所忍言者皆不足信也按自天啟元年起至七年止凡客氏出宮暫歸私第先期奏知先帝傳一特旨某月某日奉聖夫人客氏往私宅去云云至日五更欽遣乾清宮管事牌子王朝忠或涂文輔等數員及暖殿數十員穿紅員領玉帶在客氏前擺隊步行客氏自咸安宮盛服靚妝乘小轎由嘉德咸和德順右門經月華門至乾清宮門西一室亦不下轎而徑至西下馬門凡弓箭房帶簡管櫃子御司房藥房茶房請小轎管庫近侍把牌硬弓人等各穿紅蟒衣窄袖在轎前後擺導圍隨者數百人司禮監該班監官典簿掌司人數等文書房官咸跪叩道傍得客氏目視或領之則榮甚矣內府供用庫大白蠟燈籠黃蠟巨撚亮子不下二三千枝轎前提燈數對然沉香如霧客氏出自西下馬門

換八人大圍轎方是外人抬走呼殿之聲遠在聖駕遊幸之上燈火簇列照如白晝衣服鮮麗儼若神仙人如流水馬若游龍天耶帝耶都人士從來不曾見也每年不論冬夏或出三四次不止客氏到宅陞廳坐自管事起至近侍止挨次叩頭老祖太千千歲之聲殷然震天各有回答銀幣以犒酬之凡出也欽賜客氏金銀錢幣不可勝計每日三時輟御膳以賜者絡繹旁午或在外住十餘日不等而逆賢催入焉出入皆於五更其迎接圍護如一客氏私第在正義街迤西蓆市街北而逆賢亦有一第便在街南斜對門不遠賢與客氏滿擬後來得請林下受享富貴齊眉到老不料賢姪良卿客氏男國興乃駢首同戮於市蓋王國臣楊左等慘死冤魂必不肯默默寂然於泉下也初賢在西庫與孝和老娘辦膳時便漸饒裕而良卿執掌各房鎖鑰凡酒漿食物出納勤劬聞良卿雖不會多讀書而儀表堂堂亦善說話侯國興少受業於涂文輔肥蠱異常口甚小而神不足坐則眊睡氣息齁齁或與人共坐未及欠伸而已入夢鄉矣此二人形狀疊臣一面未識一字未通至於崔呈秀更不曾識面交通者也夫如是而坐曰同謀非忌者下石而何耶正經居停主人接引導師若許秉彝者以財力倖免獨以疊臣肩之冤哉事久論定自有公評必難哄天下後世也客氏住咸安宮時

先帝賜名下官人如崔祿則御前牌子也許國寧則弓箭房牌子也此外尙數人以至各衙門托役私人將數百焉又賜答應宮人十餘口及今上准歸私第之初而徐應元尙踵故事每日具御膳賜之錢幣銀兩已不能如先帝在日其隨往私第尙有賜過宮中四口后不知歸於何處而客氏笞死之日焚化揚灰爲先年逆害裕妃等報云

魏忠賢原名進忠光廟在青宮淡泊先帝旣誕之後

生母孝和王皇后卽才人老娘娘也無人辦膳賢遂貢緣入宮辦才人老娘娘及先帝之膳其介紹引進者魏朝朝乃王太監安之名下光廟甚寵信之安素剛正主持一宮事魏朝朝夕譽賢安爲朝所惑頗信之朝初與先帝之乳媪客氏暗有私卽古所稱對食者所以侍安及答應光廟多不得暇而賢遂乘間亦暗通客氏分朝愛焉客氏旣先與朝有私復暗與逆賢又私一穴兩蛟爭競必至而朝之爲人也俳而疎賢之爲人也慙而壯泰昌元年八月初一日光廟登極后擬冊立先帝爲東宮是時逆賢尙列庫衛已陞玉帶暗與客氏深謀遂相與刻意擁戴王太監安而客氏又巧逢迎之遂甘辭玉帶充東宮典膳局官此客氏力也朝與賢旣客氏私人曾結盟誓爲兄弟賢居長而朝次之及先帝卽位數月兩人因寵相媚嫉於乾清宮暖殿內爭擁客氏遂醉罵相嚷時漏將丙夜先帝已



安寢而突自御前闕起司禮監掌印盧受東廠鄒義秉筆王安李實王體乾高時明沈蔭宋晉等皆驚起是時逆賢已陞秉筆掌薪司印魏朝已改名王國臣陞乾清宮管事掌兵仗局印並跪御榻前聽處分盧受鄒義等侍側先帝玉音問客氏曰客嬭爾只說你處心要跟誰我替你斷客氏久厭國臣猥薄而樂逆賢慙猛好武且係中年自宮不識字之人朴實易制遂心向逆賢而王太監安久中客氏逆賢諛媚且心惡名下之人露此醜穢遂打國臣一掌勒令告病往兵仗局調理離御前矣此時逆賢尙名魏進忠始得專客氏從斯無避忌先帝端拱於上惟客魏之言是聽而尾大不掉之患成矣初祖制於乾清東設房五所乾清西設房五所係有名封大宮婢所住泰昌元年冬客氏遷乾西二所先帝親臨爲之移居陞座飲宴鐘鼓司官丘印等扮戲承應司禮監盧受鄒義守居而王安王體乾高時明沈蔭宋晉隨時另設吃膳之處於所內側室客氏自此在宮中乘小轎撥內官近侍擡走儼如先朝妃嬪之體止缺一青紗傘蓋而茵褥精美爲最勝焉天啟元年後改住咸安宮各衙門答應錢糧比御前更吃緊夏則大涼棚冰無算也冬則大地炕炭無算也其驕奢僭踰眞日異而月不同凡客氏生日先帝亦必臨幸陞座歡飲賞賜無限卽中宮及皇貴妃等千秋迴不及也每

日先帝所進之膳皆客氏下內官造辦名曰老太家膳聖意特甘之正經司禮監掌印掌東廠秉筆大膳房遵照祖制所造辦膳酒只爲具文備賞用而已希進御也 先帝嬰年時曾用右手小指

在殿門掇葉內剔土嬉戲光廟猝至客氏急抱起將先帝指甲被掇葉拗傷痛泣不已光廟撫之曰不妨不妨帶破些壽長仍好語勉慰客氏今後用心云 浣衣局署不在皇城內在德勝門進西

俗所稱漿家房者是也凡宮人年老及有罪廢者發此局居住內官監例有供給米鹽天啟七年十一月客氏咎死於此

明史紀事本末初帝之立也王安與諸大臣同受顧命見忠賢侵權欲重懲之奏之帝會御史方震孺上疏請逐客氏帝乃令客氏出宮忠賢發安鞫問安詰責令其自新忠賢得釋客氏夤緣復入宮將甘心於安焉時安奉旨掌司禮監辭未赴王體乾卽欲起攘之因忠賢以危言動客氏曰爾我比西李何如勢在騎虎無貽後悔西李者李選侍也忠賢遂嗾給事霍繼華劾之又令劉朝田詔等上疏辨冤客氏從中附和之於是矯旨革安而以王體乾掌司禮監忠賢必欲殺安遂以劉朝提督南海子而降安爲南海淨軍勒令自裁忠賢自掌東廠客氏封奉聖夫人命奉聖夫人客氏如皇祖戴

聖夫人例加其子侯國興錦衣衛指揮使御史劉蘭上言皇上初登寶位客氏保護是賴今釐降之儀肇舉關雎之慶方新恩禮所加權勢歸之初上大婚禮成魏忠賢廢姪二人給事中程注周之綱亦奏祖制非軍功不襲國典不當濫予俱不聽

三年光宗選侍趙氏與客魏不協矯旨賜死選侍盡出光宗所賜珍玩列於庭再拜投繯而絕成妃李氏誕二公主而殤先是馮貴人嘗勸上罷內操客魏惡之矯旨貴人誹謗賜死成妃從容爲上言之乃矯旨革封絕飲食成妃故鑒裕妃饑死密儲食物壁間數日不死客魏怒少解斥爲宮人遷於乾西所皇后張氏素精明魏客憚之后方姪腰痛客氏密布心腹宮人奉御無狀隕焉又於上郊天之日掩殺胡貴人以暴疾聞

五年五月上

祭方澤還宮卽幸西苑時日已晡忠賢與客氏乘大舟飲酒歡甚上獨與宦豎二人泛小舟蕩漾上身自刺舟一璫佐之相顧笑樂忽風起舟覆上及二璫俱墮水中二璫死焉上救免忠賢及客氏相顧錯愕而已九月賜客氏印文欽賜奉聖夫人客氏出外宅

七年秋九月賜奉聖夫人客氏金

幣加恩三等廕一人錦衣衛指揮使世襲八月上不豫二十二日乙卯上崩丁巳信王卽皇帝位九月出奉聖夫人客氏外宅十一月甲子錢嘉徵疏上忠賢十大罪至是謫忠賢鳳陽司香祖陵籍客